

佛說右遶佛塔功德經

唐于闐三藏實又難陀譯

如是我聞一時佛在舍衛國祇樹給孤獨園與大比丘僧及餘無量眾俱前後圍遶爾時長老舍利弗即從座起偏袒右肩右膝著地

合掌向佛以偈請曰

大威德世尊 願為我等說 右遶於佛塔

所得之果報

爾時世尊以偈答曰

右遶於佛塔 所得諸功德 我今說少分

汝等咸善聽 一切諸天龍 夜叉鬼神等

皆親近供養 斯由右遶塔 在在所受生

遠離於八難 常生無難處 斯由右遶塔

於一切生處 念慧常無失 具足妙色相

斯由右遶塔 往來天人中 福命悉長遠

常獲大名聲 斯由右遶塔 在於閻浮提

常生最尊勝 清淨種姓中 斯由右遶塔

儀貌常端正 富貴多財寶 恒食大封邑

斯由右遶塔 財寶恒盈積 而無慳吝心

勇猛廣惠施 斯由右遶塔 色相淨微妙

見者皆欣仰 所住常安樂 斯由右遶塔

或為刹利王 妻子悉具足 威勢力自在

斯由右遶塔 或作婆羅門 持成善通達

呪術圍陀典 斯由右遶塔 或為大長者

豪貴多財產 倉廩常豐足 斯由右遶塔

或為正法王 自在王閻浮 率土咸歸化

斯由右遶塔 或為具七寶 大勢轉輪王

十善御羣生 斯由右遶塔 從此生天上

常有大威德 淨信於佛法 斯由右遶塔

淨信速成已 於法無迷惑 見諸行皆空

斯由右遶塔	從天上捨命	下生於人中
入胎不迷亂	斯由右遶塔	在於母胎中
垢穢所不染	如淨摩尼珠	斯由右遶塔
處胎及生時	今母常安樂	飲乳亦復然
斯由右遶塔	父母及親戚	一切共鞠養
乳母常不離	斯由右遶塔	眷屬皆愛念
超過其父母	資財自增長	斯由右遶塔
夜叉諸惡鬼	不能暫驚怖	所須自然得
斯由右遶塔	經於百千劫	其身轉清淨
妙色相成滿	斯由右遶塔	淨眼脩且廣
猶如青蓮華	兼得淨天眼	斯由右遶塔
妙色常圓滿	諸相自莊嚴	成就大勢力
斯由右遶塔	或生帝釋宮	大威勢自在
忉利天中尊	斯由右遶塔	或生須夜摩
兜率陀天宮	化樂及他化	斯由右遶塔

或復生梵天	梵世最自在	諸天常供養
斯由右遶塔	億那由他劫	常為諸智人
恭敬而供養	斯由右遶塔	其身及衣服
億劫常無垢	具足白淨法	斯由右遶塔
具大精進力	勤修種種行	未嘗有疲懈
斯由右遶塔	勇猛常精進	堅固不可壞
所作速成就	斯由右遶塔	深遠微妙音
聞者皆歡喜	安樂常無病	斯由右遶塔
如我所演說	默捨三有苦	成就出世智
斯由右遶塔	常在四念處	及以四正勤
四如意神足	斯由右遶塔	了達四真諦
根力七覺分	正道及聖果	斯由右遶塔
滅一切煩惱	具足大威德	無漏六神通
斯由右遶塔	永離貪恚癡	及一切障礙
證獨覺菩提	斯由右遶塔	得妙紫金色

相好莊嚴身 現作天人師 斯由右遶塔
皆由以身業 及語業讚歎 右遶於佛塔
成此大利益 右遶諸佛塔 所得功德聚
我今隨所問 略說詎能盡
爾時世尊說此偈已舍利弗等一切衆會皆
大歡喜信受奉行

佛說右遶佛塔功德經